




O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

IUNI 2016

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

CRISTO REDENTOR O KERISO LE TOGIOLA

O le faatagata o Cristo Redentor, poo Keriso le Togiola, e 90 futu lona maualuga. E 1320 tone maafola Parasila e faamalosiina i u'amea, o loo fauina ai lenei faatagata. Ua fau i luga o se mauga e tasi ma le 'afa maila lona maualuga mai le maualuga o le suasami o le vasa. O le
faaauau itulau e 2

Pepa Mafutaga a Tina mo le Fono Tele 2016

silasila i le itulau e 9

O le Mafuaaga o le Pese: Standing On The Promises

faaauau itulau e 8

O 'Au mo Suo Galue

silasila itulau e 13



CRISTO REDENTOR: O KERISO LE TOGIOLA

mai le itulau muamua

faatagata o Keriso le Togiola, poo Cristo Redentor i le gagana Potukale, (Portuguese - o le gagana a le atunuu), o loo tu ma vaavaai ifo i le laumua o Brazil, o Rio de Janeiro. O Brazil, o le atunuu lea e aupito sili ona toatele ai tagata lotu Katoliko Roma i le lalolagi atoa.

E leai se turisi e asiasi atu i Rio e aunoa ma le a'ea'e atu i le Mauga o Corcovado e matamata i lenei faatagata tele. O le ulu o le faatagata e iva futu, poo le tasi ma le 'afa gafa, le umi. E faaloaloa i le itu taumatau ma le itu agavale lima o le faatagata, o le umi mai tumutumu tamatama'ilima taumatau i tumutumu o tama'ilima agavale e 63 futu.

Ua tele a'u a'ea'ega i luga o le mauga ou te matamata i le faatagata, ae le tutusa isi taimi mulimuli ane ma le taimi muamua na ou 'a'e ai i le faatagata, i lo'u ofo ma maofa i le matua tele o le faatagata.

Sa ou a'oga i le iunivesite i Amerika, a o le tuuaga o le tau mafanafana lea na ou tuua ai i Rio de Janeiro le laumua o le atunuu o Brazil. Ua ou faitau i tala i le faatagata lenei i le mekasini o le National Geographic. Na ou mautinoa mulimuli ane, e leai lava ni faamatalaga poo ni ata a se mekasini e mafaia ona faamatala ma faailoa mai le matagofie ma le tele o lenei faatagata.

Na ou tu i luga o le mea o iai le faatagata ma ou vaai ifo i lalo ia Rio de Janeiro. E fitu miliona tagata o nonofo ai i lea taimi. Na ou vaai atu i mata o le faatagata, e tauaso. E le taumate o le a e faapea

ifo, e faapea uma lava faatagata, e tauaso. Peitai e foliga mai na fauina lava e le tagata na ia faia, ina ia foliga tauaso le faatagata; o le mafuaaga o la'u tala lea, ona e leai ni ona 'i'oimata, poo ni laina papa'e e iloa ai e pupula.

Na tuutuu ifo i lalo o lo'u manava la'u meapu'eata, ma ou faapea, *O le a lenei ituaiga togiola? E tauaso? O loo vaai taula'i atu i le tafatafa'ilagi mamao, ae le se'i vaai ifo i le miliona ma miliona o tagata oi le aai o Rio e latalata atu?*

O le isi mea na sosoo ona ou matauina, amata mai le isu, sosoo ma le 'auvae, oo i le ua. Ona oo atu lea o la'u vaai i le pulupulu. I fafo o le pulupulu o iai se fatu

O se fatu maa. Na ou tuu fesili i le uiga o le fatu maa. *O le a lenei ituaiga puluvaga, poo le togiola? O lona fatu e faia i maa? E le fusia faatasi e le alofa, ae taofiofi e le sima. O le a lenei ituaiga puluvaga e tauaso toe fatu i maa?*

E le'i umi ae ou toe maua lava e a'u tali i a'u fesili. O ai lenei ituaiga togiola? O le ituaiga togiola tonu lava lea e fiafia iai le toatele o tagata! O le toatele o tagata e manatu o Iesu e pei o le seevae u'amea o le solofanua lea e avatu tautau i le faitotoa, e laki ai i ana mea e fai i lona olaga. Poo le ivi magalua o le moa lea e falo e tamaiti poo ai e tele le pito e gau atu ia ia. Poo se mea lea e tautau i lau taavale e te laki ai ma e sao mai faalavelave. O le ituaiga puluvaga lea, poo le togiola, e pei o Alatina ma lana Lamepa i le tala i tusi faitau a tamaiti, e te milimilia ona oso mai lea o le mea e te mana'o iai. 'A 'e mana'o i se

galuega, milimili le lamepa. 'A 'e mana'o i se taavale fou, milimili le lamepa. 'A 'e mana'o i sau ava aulelei, milimili le lamepa. O le ituaiga puluvaga lea, a maua le mea na e mana'o ai, ona toe oso lea i totonu o le lamepa ua nofo ai. O le ituaiga puluvaga lea e te mana'o iai e le mana'omia ai ni taulaga ola e pei ona fai mai le tusi a Roma.

E le o le puluvaga lena o fai mai ai le Feagaiga Fou. Faatusatusa mai le Keriso tauaso na ou vaai iai i Rio, i le Keriso alofa na fefe ma masiasi le fafine na vaai iai i se taeao popogi i Ierusalem.

O le tafa o ata. Ua valivali mai e le la oso lanu o le taeao popogi. Ua tafe ifo i laulaaui mataua taimane o le sau o le vaveao. Ua tapisa moa ma toto'e toa ina ua susu'e e le la le 'ie'afu o le po. A o le taimi lea ua si'osi'o ai e le 'au faalogologo le Kamuta mai Peteleema a o talanoa. O loo faalogologo ma luelue o latou ulu ma talia a'oa'oga o fai atu ai lo latou Alii. Na vave ala i latou i lea taeao. Ua usua'i e fetaia'i ma le Alii, ua sili atu lea ia i latou i lo le momoe ma malolo i le taeao sesegi ma le malulu.

Tatou te le iloa le mea na talanoa ai o ia i lea taeao. O le tatalo? Poo le agalelei i tagata? O le a lava, ae te'i ua vevesi atu ni tagata ma aga'i atu ia Iesu. E toatele i ta'ita'i faalelotu, o toaina o le lotu, ma tiakono o lea vai taimi. O tagata taua ma le aloa'ia. O loo latou toso maia se fafine, fai mai na latou maua atu o mulilua. Ua tulei atu le fafine i luma o le Alii, ma fai atu, "Le a'oa'o e, ua maua lenei

faaauau itulau e 5

O LE LAUGA

saunia e
Elekosi Viliamu FS
Aleisa Sisifo

Tusi Paia: Luka 4:1-20

Matua: Luka 4:14: “Ona fo’i atu lea o Iesu i le mana o le Agaga i Kalilaia, ua logo atu foi le tala ia te ia ua soo ai le itu uma.”

O le fesili ua fa’a’auto iai le mafaua o le lauga - E mai ia te ai faamanuiaga? O fea e maua mai ai manuia? O lena e fai mai ai le matua i le tali: E maua mai le Agaga Paia o le Atua.

Ua fo’i atu Iesu i Kalilaia ma le talita - ua siamupini i le Agaga Paia. Ua logo foi le tala ia te ia. Ua manumalo i lena itu o le lalolagi. E leai lava se isi malosi ma se mana nai lo lenei, le mea alofa foa’i fua a le Atua na te aumaia manuia. E leai sona tau. E ave fua. E le faapito i se isi. “.....e i’u ina liligi ifo lo’u Agaga i luga i tagata uma lava.” (Ioelu 2:28). E aumai foi ma le faaeteete ina ne’i loto fefete nisi ma fia sisili ona pa’u’u ai lea ma malepelepe.

O le Agaga Paia lea na na aveina Iesu i le vao e tofotofoina e Satani. E ese ma le malie o faiga faale-Atua o le aumaiga o ana

faamanuiaga. E ‘ave muamua tatou i le vao se’ia fia aai ai ma fia feinu ai. O le alii lenei o Satani, e leai se isi ua vaai iai. Pe puupuu pe tupu umi. Pe aulelei pe fa’a’ause ma tinovale. Na o sina faamatalaga laitiiti faapea i ona foliga - o le fili o le Atua ma mea lelei uma. O le tau faasese. O le tofotofoto. O le tau faaleaga ma le faaososo. O le tiapolo le isi ona igoa.

Ua matua Iesu ua 30 ona tausaga. Ua tupu lona tino, lona loto ma le mafau. Ua tumu o ia i le Agaga Pa’ia. Sa iai le Agaga Pa’ia i lona papatisoga. Na faapepepepe ifo i ona luga faapei o se lupe. Ae oo mai ai ma le si’ufofoga mai le lagi: “O lo’u Atalii pele lena, ia outou faalogo ia te ia.”

Fai mai Luka - O le Atamu muamua ma le Atamu lua (o Iesu lea) ua lavea uma lava i le tofotofoga a Satani. Ua siilima le Atamu muamua ua loto i le agasala ma le oti. A o Iesu le Atamu lua, ua tetee ina ia tatou maua le ola ma maua atili ai lava. Ua oso tonu mai tofotofoga a Satani:

* i le mana’o o le tino (the lust of the flesh)

* i le lasi o le vaai o mata (the lust of the eye)

* i le faasausili ma le loto fefete (the pride of life).

E finagalo Iesu e sili atu Afioga a le Alii nai lo mea’ai. O le ola faalagolago i le Alii na te aumai mea e tatau ma le aso.

O le faaali foi ia Iesu o malo uma o le lalolagi, ae se’i ifo atu Iesu - Leai, leai lava! E manao Satani sei ola uiese, taamilo ese ma Iesu mai puapuga o le satauro ae ui i le alapuupuu e tau atu ai i le pule ma le mamalu. (Satan’s method involving a detour around the cross to take the easy way to power). Leai Satani - na o le Alii lava e te

ifo iai.

Ua faatonu e le si’usi’u le ulu fai mai: Oso i lalo faitalia agelu ona puipui oe nei tu’ia lou vae i se maa. Tali Iesu: ‘Aua! ‘Aua e te tofotofoto i le Alii lou Atua. Ua manatua e Iesu le tofotofoina o le Atua e Isaraelu i Meripa. Na oona le vai ae faasuamalie e le Atua sei feinu ai le nuu puapugatia ma le muimui. ‘Aua ne’i toe faia le tomumu ma le muimui. Ia faatuatua i le Atua ae ‘aia le tofotofoina le Alii. (God is to be trusted and not tested). O le mea na le mafai e Atamu, na mafai tele e Iesu. O le mea na le mafai e Isaraelu i le vao - muimui i le fia ‘a’ai ma fia feinu. Na mafai tele e Iesu. Tiga ona iloa e Satani e le o ia te ia se pule i mea’ai ma isi mea na fai atu ai ia Iesu, ae tautala lava faapei o se tasi na te avatu mea faapena.

O le tasi lena uiga o le ti’apolo o loo ola mai nei lava i lo tatou lalolagi. E ola foi i totonu o le lotu a Keriso.

Satani, alu ia oe i o’u tua. O le tala foi lea a Iesu i lona soo faamoemoeina o Peteru. Ua silafia e Iesu lona alofa tau’ole’ole ia te ia. Alu ia oe Peteru i o’u tua, aua ua e loto i mea a tagata, ae le o mea a le Atua. O fea e sau ai faamanuiaga? E tafe mai le Agaga o le Atua.

Poo le tausaga e 1963 i le vaega i Saute lava o Amerika (Deep South), na vevela tele ai le faafitauli o le faailoga lanu - tagata papa’e ma tagata uli o Amerika. E iai le tala i se faifeau tamauli, o Billup lona igoa. O se tasi po na ave faamalosi ai o ia mai lona aiga e ni tagata se to’a valu e saisai uma o latou foliga. Ua ave ma fasi ma ave mea sa ia te ia. Ua latou saisai si alii faifeau i le laau, ma faamasino ma upu leaga iai - E te mafai ona tatalo? Tatalo nei. Sa taumafai Billup e tatalo tiga le tigaina. Upu o le tatalo: Lo’u Tama e, ia e faamagalo ia i latou

faaauau itulau e 4

FAASILASILAGA

E fia faasilasila atu i le mamalu o le aufai lauga o le Sulu Samoa, e le o le Faatonu o le Sulu e faia le lisi o le au fai lauga mo le nusipepa o le Sulu Samoa. O le lisi e aumai mai le Komiti a le Au Toeaina.

O LE LAUGA

mai le itulau e 3

aua ua latou le iloa le mea ua latou faia.

Ua fai pea le tatalo ua faapea: Ia e faamanuia i nei alii e to'a valu ma o latou aiga, o ta'ito'alua ma fanau. 'Aua ne'i oo iai ni puapuaga faapei ona oo mai ia te a'u i lenei po.

E le'i iai lava sina upu e tasi o le tatalo e faasino ia te ia ma lona puapuaga. Ua tuia loto o le 'au ula leaga i le tatalo; ona sosola lea ae saisai ai pea le alii faifeau i le laau. Ua maua atu Billup ona laveaiina lea ma faasao lona ola. Ua fai ona manu'a, ua lelei ona toe faasaga lea i lana galuega tala'i.

Pe tolu tausaga talu lea faalavelave, ae tu'itu'i mai le faitotoa o Billup ma lona aiga i le

po. Ua faaletonu le alii faifeau pe tatala pe leai, ne'i toe tupu foi se isi faalavelave. Ua leva le po. Tu'itu'i, tu'itu'i pea. Na i'u ina tatala ona o le faatauanau mai. Talofa e, o se taule'ale'a papalagi ua ifo to'ele mai. Fai mai - Reverend, do you know me? I think you don't know. O a'u lea o le tasi o le to'a valu na fasia ma saisai oe i le laau i le tolu tausaga ua te'a. Ou te faato'ese atu, faamagalo mai a'u. Ua ou ola faasevasevaloina talu lea aso. Faamagalo mai ia toe lelei ai lo'u olaga. Ou te ta'u atu nei igoa o le isi to'a fitu. Ma valaau leoleo e o mai e avatu uma matou i le falepuipui.

Tago atu loa le faifeau opo mai le taule'ale'a. Leai e le ta'ua fua i leoleo. Ta'u i le Atua o le agasala

tuufaasolo a le lalolagi o le fe'ino'inoa'i ae le'i fai mai ai Iesu. Tatou tatalo e ta'u i le Atua e ana le faamagaloga ma faamanuiaga e faaliu suavai loto o tagata ia toe lelei. Ona fai lea o le tatalo a le faifeau ma lona aiga o tamauli ma le alii lanu pa'epa'e.

O lenei alii papalagi sa gasegase i le ma'i o tagata o le lalolagi o le siana poo le virus o le fe'ino'inoa'i, faailoga tagata, faailoga lanu. E i Amerika, Aferika, Asia, Peretania, Pasefika, nuu uma lava. E tolu tausaga o galue le Agaga o le Atua e faamalolo lenei taule'ale'a na sau e toe faato'ese. Na avea manu'a o le alii faifeau tamauli, e malolo ai le agaga o le alii pa'epa'e. Faapei o manu'a o Iesu. Ua to'atele i tatou ua malolo i faalavalava o Keriso. Tatou tatalo ia saga faatele mai le Agaga o le Alii e susunu otaota o tatou olaga. Tusa pe tiga ae lelei ai. Amene.

(E sui ai le lauga na tofia e le'i taunuu mai)

O le 'Avefe'au Folafofa a le Tama Meamea

Saunia e Palemia Tauilili FS

Luka 2; 36-40

O Luka e le se Iutaia, a o le tagata o nuu ese. E le pitotasi lana vaai i sona tupuaga pei o le masani a Iutaia e manatu faapito i lo latou tupuaga mai ia Aperamo. Ae lautele lana vaai i tagata eseese ma lo latou taua. Le mea lea o loo manino mai i le faamoemoe o lana evagelia - ia o'oo'o i tagata uma le Tala Lelei o le Faaolataga. Tasi lea faamamafa a Luka i lana tusi, o le faataua o tagata uma, aemaise lava tina ma fafine, eg. Elisapeta ma Maria ma Ana le perofeta fafine leae ta'ua i le vaega o le tusi sa faitauina. Masalo Ana o se toalua o se ositaulaga fua i le ta'ua

o lona tupuaga mai le ituaiga o Asera. Ae le o le mea aupito taua lea; o le faataua a Luka, o se tasi lenei o uluai tina na molimau i le oo mai o le Mesia sa nofo faatali iai Isaraelu.

Na o le fitu tausaga na nonofo ai Ana ma lana tane i lona talavou ae maliu lona alii. Ona nofo fua ai lava lea seia oo ina olomatua - ua 84 ona tausaga, ae i lena taimi atoa, e le'i mate le lamepa o lana molimau i le faaolataga na valo'ia mai anamua. Na mau pea i le malumalu ma faatalitali i le afio mai o le Mesia e faaola ia Isaraelu. Na tuu atoa lona ola i le Atua i le malumalu e ala i le tatalo ma le

anapogi. Faapei o se molimau fafine na te agaia le toeaina o Simeona sa nofo faatalifo i le malumalu mo le oo mai o le faaolataga a le Atua. Na la tau fai vaai uma i le tama meamea o le faaolataga. E ui ina eseese tatou ma Ana, a o le feau lava lea mo tagata uma, ia folafola le Faaolataga. Fai i tatou ma 'avefe'au a le Atua i o tatou aiga, nuu, Ekalesia ma le atunuu.

Palemia Tauilili FS

“Ae peitai, o le a maua e outou le mana, pe a afio ifo le Agaga Paia i luga ia te outou; e fai foi outou ma molimau ia te a'u i Ierusalema, ma Iutaia uma lava, ma Samaria, e oo lava i le tulu'iga o le lalolagi. (Gal. 1:8)

CRISTO REDENTOR:

O KERISO LE TOGIOLA

mai le itulau e 2

fafine ina o mulilua, ua mautinoa lava. Ua poloai Mose ia te i tatou i le tulafono ia fetogi i maa tagata faapea; a o oe, pe se a se mea e te fetalai mai i ai?”

Ua vaavaai atu le fafine i le motu o tagata, pe na te maua ai ni mata alofa. Ae na o mata inoino. Tuutuu ifo i lalo le vaai a le fafine, ma na iloa atu, e na o maa mea ia e ‘u’u mai e tagata, e faaagaga mo le fetogiina o ia ua maua o agasala.

Ona tau atu lea o lana vaai i le Alii. E le inoino lana vaai. E le ita. Pei e fai mai ona mata: “Aua e te popole! E leai se mea o iai!” O le taimi muamua lea i lea taeao ua iloa atu ai e le fafine ni foliga alofa, ina ua vaai lelei atu i fofoga o le Alii Faaola.

Ina ua silasila atu Iesu i le fafine, o le a le mea na ia silafia? Pe na silasila atu e pei o se tama i sona afafine ua matua a o savali atu i totonu o se malumalu e faaipoipo? Ua vili faaata i le mafaufau o le tama le olaga o le afafine a o tuputupua’e, mai le taimi o fai ona napekini oo atu ai i meataalo. Mai le taimi o a’oga se’ia oo ina fai sa na uo?

Ua vaai atu o ia i le fafine, e leai ni ona seevae, a ua palapala uma ona vae. O loo pupuni e ona lima lona fatafata, e le taumate ona o lona masiasi ona ua maua atu e tagata o agasala, a o ona alofilima o loo tuu faatasi i lalo ifo o lona auvae. A o ona lagona, ua fetosoa’ina e le gata i lona masiasi ina ua maua o ia o agasala, a o le alalaga inoino a tagata ona o lana amio.

Ona taumafai ai lea o Iesu, e pei lava o se isi tama alofa i sona afafine, e togafiti le faafitauli. Na amata lana fesoasoani i le tau

ta’ita’ieseina lea o mafaufau o tagata. Ua ia tusingi i le palapala. Ua taufai vaavaai ifo i le eleele tagata, ma avea ma mea ua mapu ai le fafine i le faataupupula atu o tagata ia te ia.

Sa ono fesili le Alii pe aisea na latou le aumai ai le tamaloa, aua e agasala foi ia. Sa ono fesili foi pe aisea ua latou tapatapa ai i le tulafono ua fia selau tausaga e le o faaaogaina, peitai na te le’i faia. Na ona ea a’e i luga lona ao ma fai atu, “O so outou e leai sa na agasala, ia lua’i togi se maa ia te ia.” Ona toe punou ifo ai lea o ia ma faaauau ona tusingi i le palapala. Ua feme’ia’i tagata, fetiltilofa’i, tautulei, liliu, ma o ese ta’ito’atasi. Aua faapa’u’u ifo a latou maa i le mea sa latou tutu ai. E toe ea a’e i luga le Alii ua leai se tagata, ua na o le fafine. Ua fetalai atu Iesu i le fafine, “Funa e, oi fea ‘ea i latou? Ua le faasala mai ea se tasi ia te oe?”

“Le Alii e, e leai lava se tasi.”

Ua ‘ata’ata le Alii. Aua manatu le fafine ua na o le to’atasi lava le tagata e mafai ona ia faasala ia te ia. Mata o le a otegia o ia e le Alii ma fai sana sala? Pe savali ma alu ese ma ia le fafine agasala?

Na matua maofa le fafine i le mea na fai e le Alii ia te ia. O le a? O le folafolaga ma le fe’au na tuu atu ia te ia:

O le folafolaga, - promise: “Ou te le faasala foi ia te oe...”

Ma le fe’au - mission: “Aua e te toe agasala.”

Ua liliu le fafine ma alu, ma leiloa atu ai lava. E le’i toe vaai pe faalogo foi iai se isi. Ae tasi le mea ou te mautinoa, o lea taeao i Ierusalem, na vaai ai o ia ia Iesu Keriso, ma e na silasila atu foi Keriso ia te ia, ma la feva’aia’i!

E mafai ona tatou sii mai le ata lea ma tatou o i Rio de Janeiro, ma faatu le fafine i le faavae o le faatagata o Cristo Redentor? Ou te talitonu lava i le tala a le fafine o le a fai pe a vaai a’e i luga i mata o le faatagata: “E le o Iesu lea na ou vaai iai!” Ma e sa’o lelei le fafine. Aua o le Iesu na vaai iai i Ierusalem, e le maa lona fatu; e le tauaso foi ona mata!

‘Ae ‘a ‘e toe sii foi le ata ma faatu le fafine i luma o le satauro i Kalevario, ou te talitonu i lana tala o le a fai: “O ia lea! O Iesu lea! O Iesu mo’i a lea!”

O le a ia manatua ona lima, ona pau ia o lima e le’i ‘u’uina ni maa e fetogi ai ia. Ma o lea aso i Kalevario, na te le o ‘u’uina lava ni maa. A ua faalogo atu i lona si’ufofoga o fetalai, “Lo’u Tama e, ia e faamagaloina atu ia te i latou, aua ua latou le iloa le mea ua latou faia.”

I le tafu’e o le satauro i Kalevario, o le a vaai atu le fafine i fofoga, i mata o le Alii - mata alofa, ma loimata maligi. Mata e le’i vaai i lana agasala, a ua vaai i lona faamagaloga!

(O le tala na tusia e Max Lucado, faamatalaina e Afemata Apelu Aiavao)

o le tusi:

Malua Journal

**O loo lolomi ai Pepa o
Mafutaga a Faifeau i
Malua.**

**E maua mai le Kolisi
Faafaifeau i Malua**

(George Fox: 1624-1691)

O SIAOSI FOSI

O LE NA IA FAASA'OLOTO LE AGAGA

faaauau mai le masina o Me

O lona taunuu atu i Lonetona, na mautinoa ai lava e Fosi o le a ia mauaina se tagata e mafai ona ia talia ana fesili, ma te'a ai le taua faaleagaga o pupuna i totonu o lona loto. A o iai la i Lonetona, sa ia faalogologo ai i failauga iloga o ia taimi, ae le maua mai ai lava se fesoasoani mo ia. Fai mai fautuaga a nisi o latou e alu e saili se teine lelei la te faaipopo, o ia lena o le a ia fesoasoani e aveesea ona mafatiaga. Fai mai foi se isi, e alu e faafitafita, aua a avea ma fitafita, o le a leai se taimi e soona vevesi ai lona mafaufau. A o nei mau fautuaga na atili faaletonu ai Fosi.

Na tuua e ia Lonetona ma la fetai'a i ai ma se tasi o faifeau mai lona nuu. Na manatu Fosi, o le a mafai ona tali e le faifeau lea ana fesili. Peitai, na oo ina malamalama ane, e sili atu ona tele o fesili a le faifeau lea e fai ane ia Fosi, i lo fesili a Fosi, ma oo ai ina tali uma e Fosi fesili a le faifeau, ma sosoo ai ma lona faalogologo ua faaoga e le faifeau lea ana tali i lana lauga i le Aso Sa na sosoo ai. Na faanoanoa ai lava Fosi, ma ia toe alu ai foi i se isi faifeau i se nuu tuaoi. Ina ua uma ona faalogologo le faifeau lea i mafatiaga faaleagaga o Fosi, ona fai ane lea ia Fosi e alu e ulaula tapaa ma pesepese i Salamo. Peitai, mulimuli ane, o lea fautuaga le fetai, na oo ina talasua ai le faifeau lea i tagata o le nuu, ma amusia ai Fosi e tagata ma ula ane ai pe a savali ane.

Na toe alu foi lea i se isi faifeau, ma o ia lea na faatonuina Fosi, ina ia faamaligi lona toto ona o ona

mafatiaga e mafua mai i se ma'i. O le "faamaligi" o le toto o se togafiti lea sa taatele i ia vai taimi. O lona uiga e fai se tipi i le tino ina ia tafe ai le toto ma alu ese ai le ma'i o maua ai le tagata. E ui lava na faia lea togafiti ia Fosi, ae na ia tusi mulimuli ane e faapea, na matua mago lona tino ona o ona faanoanoaga, mafatiaga ma le tele o faafitauli, na matua leai ai se mataua o le toto na maua mai lona tino. Na ona ia mana'ona'o i lea taimi ma'imau pe ana le fanau mai o ia.

O se Upu e Uiga i Perofeta

E fia fai sa'u faaopoopoga i le taimi lenei. E malie lava ia te au ia tusi na saunia e ni vaega o le Sosaiete o Uo (Society of Friends) ma ni a latou faamatalaga na fai ai e uiga i le olaga o Fosi. I nei aso, ua vaevaeina lea Sosaiete i ni talitonuga eseese, ma o le a ou faamatalaina ia vaega mulimuli ane. A o se tasi o latou, o le Liberites, o se vaega e le faavaeina i luga o talitonuga faalelotu. O latou ia e le talitonu i le fanau mai o le Faaola e le Agaga Paia. O latou ia na latou tusia se tusi e aupito lapo'a e uiga ia Fosi.

Ina ua uma ona ou asiasi i le nofoaga autu o mataupu tau Fosi i Lonetona, e mafai ona ou fai atu ma le faanoanoa, o latou o tumu ai, o le 'au Liberites. E foliga mai ua latou fulitua i mea moni tau i lo latou ta'ita'i o Fosi e uiga i le galuega a le Agaga Paia ma mataupu silisili o le Tusi Paia. A ua latou faalagolago i lo latou lava atamai ma o latou mafaufauga. A e talanoa atu ia latou e uiga i le

taimi lea i le olaga o Fosi, e le taumate lo latou fai mai, o le vai taimi lea na faaletonu ai le mafaufau o Fosi, pe na valea ai ma maua ai foi i nisi ma'i o le tino. Peitai, e leai.

O perofeta e iai taimi e 'o'ono ai i mafatiaga ma puapuaga, ae le o se vaivai pe o le faaletonu o le mafaufau. E ese mea o loo latou vaavaai atu iai e le iloa e isi tagata, ma o le tele o taimi, latou te matua lagona le fatu, heart, poo le agaga poo le finagalo o le Atua i soo se mea. A le maua e se perofeta se ala e mafai ona faamalamalama mai ai mea o ia vaaia, e oo ina tupu ai le lagona mafatia i lona loto. O ia lagona e masani ona tula'i mai pe a le malamalama le perofeta i le taimi o taunuu mai ai, ma uiga o le siosiomaga o iai. O nisi taimi e matua tele se faafitauli o latou vaai atu iai, ona latou talitonu lea ona pau lea o le fe'au e tataua ona latou laugaina. A le malamalama iai isi tagata e pei ona malamalama ai perofeta, (aua e le o tagata lautele na aumai iai le faaaliga poo le fe'au), o a latou upu, ma o latou uiga, e ono faamanu'alia ai perofeta vaivai. O le perofeta e tataua ona ia faaoo atu le fe'au mai le Alii, ona ia tuu ai pea lea o le fua mai o lea feau, i le Atua.

E le tataua i perofeta ona avea le feau o latou avatu, faapea lo latou naunauta'i mo agaga o tagata, e faalavelaveina le lagona o le tagata, poo le galuega a le Alii i le ola o isi tagata. O le galuega a le perofeta o lona ta'uina atu lea e pei ona ia faalogo iai, ona tuu pea ai lea i le Alii ma le au faafofoga e latou te mulimuli atu ai.

Ua Matua Lou Agaga?

Ua oo ia Fosi se galala faa-perofeta. Ou te manatu na ala ona maua o ia i lea lagona, ona o le faatuputuina pea lea o le malosi o lona loto mo lana galuega mulimuli ane. O lona uiga, o loo ia faatuputeleina le mea ou te ta'ua

faaauau itulau e sosoo ai

(George Fox: 1624-1691)

O SIAOSI FOSI

O LE NA IA FAASA'OLOTO LE AGAGA

mai le itulau e 6

o le "loto ua matua", poo le tofa loloto faaleagaga.

O le uiga lenei o le mea o loo o'u taumafai atu e faamatala. Tusa lava pe o le a le tele o to'atuga e fetai'a'i ma Fosi ona o le le faamaoni o faifeau, ae taumafai lava. E lagona lava e ia le vaivai ma le leai o se faamoemoe i isi taimi, ae le'i muta ai lava lona taumafai pea. E le faavaivai lava i le sailiga o tali o loo ia mana'omia, ma ia faitauina pea le Afioga a le Atua, ma ta'ele ai lona agaga ma faalogologo pea i le fesoasoani mai o le Agaga Paia. Ma e faapena ona e atia'e lou matua i lou agaga ma lou loto i le feagai ai ma sauaga ma faitioga.

Ua uma ona faatonuina e le Atua ia Fosi ina ia puipuia lona loto ma ona lagona, ma o loo ia faia. 'A 'e atia'e lou matua faaleagaga, i lou faafeagai ai ma mea e le lelei e ono aafia ai lou loto ma ou lagona, e tatau ai la ona puipuia lelei lou agaga ma lou loto. Ia, pei lava ona fai e Fosi, ia faapea ona faatumuina oe i le Upu a le Atua, aemaise lava i vaega o le Afioga a le Atua e fetai tonu ma mea o loo aafia ai oe. 'A 'e faaavanoaina le Agaga Paia e ta'ita'iina oe ma fesoasoani ia te oe, e le umi ae mafai ona e savali i luma e aunoa ma le faalavelaveina o oe e mea ia o faaululito mai ou luma. O le Upu, ma le Agaga Paia, ma lou taumafai malosi e alu pea i luma, o le a avea lea ma mea e atia'e ai lou malosi faaleagaga i vaega ia o lou loto.

O le mea foi lea na oo ia Fosi. O faifeau ia sa mana'o e sola ese ai,

e le'i umi lava ae avea i latou ma matati'a o loo ia sa'ilia. A fia avea o ia ma ta'ita'i, e le mafai ona faamoemoe o ia i tagata e latou te aumaia tali i taimi uma, pe o se faamafanafanaga i lona loto. I le olaga moni faa-tagata Toefuata'i, na o le Atua lava le puna o le malosi i aso uma. Na malamalama lelei Fosi i lea mea.

O Lana Faaaliga Muamua: O le Fanaufouina

Na toe fo'i Fosi i lona aiga i le tausaga e 1644, a o loo fenumia'i pea lona mafaufau, ma e na te le'i maua foi tali o loo ia sailia. Na naunauta'i lava ia maua le Atua, ae le'i mana'o o ia na te tulituliloa o ia i se ala e atili ai ona vevesi lona mafaufau ma faavaivaia o ia.

Na matua uiga ese lava lona tuua o lona aiga ona o lona tau saili o le Atua ma lona finagalo, ma na avea foi lea ma mea na alu ese ai ma ua le toe auai i sauniga i le lotu sa o iai ma ona matua a o talavou, le lotu Pereaereane (Presbyterian Church). Na matua ofo ona matua ma tagata o le nuu ina ua fulitua Fosi i le tapua'iga na faafaileleina mai ai o ia a o laitiiti. A o tagata i le lotu, ae alu Fosi ma lana Tusi Paia i le mea tuufua i le tumutumu mauga, e mafaufau ai i vaega eseese o le Tusi Paia.

O lea faiga a Fosi, na avea ma masani i lona olaga atoa. O taimi o sauniga lotu, ae o le la e fesavalai'a'i Fosi i lafanua o le nuu ma togalaau 'aina, ma faitau lana Tusi Paia, tatalo, ma fagatua ma agaga leaga o loo tauivi ma lona agaga. Na ia maua ai foi i ia vai taimi ni faaaliga mai le Agaga o le

Atua e uiga i mataupu silisili o ia faitauina mai le Tusi Paia.

O vai taimi ia o lona tau saili, ma mafuta foi ma le Alii, na amata malamalama ai Fosi e uiga i le faaaliga fou i lea vai taimi. O le mea moni, o le faaaliga na maua e Fosi i lea vai taimi na avea ma maa faavae o lona olaga ma lana misiona mulimuliane. O ia faavae maumaututu na avea mulimuliane ma talitonuga na amataina ai le faavaeina o le tapua'iga ua ta'ua o le Quakers, poo le Sosaiete a Uo - The Society of Friends.

O lana faaaliga muamua lava o le malamalama lea i le fanaufouina. E ui lava o loo a'oa'oina i lotu (e faapea o Kerisiano uma o tagata talitonu poo tagata faatuatua), ae na talitonu Fosi e tasi lava le mea e avea ai le tagata ma Kerisiano, pe afai lea ua liua o ia mai totonu, ma maua ai e le tagata le ola faavavau. O le mea lea, o le toe fanaufouina, avea ma tagata o le Ekalesia, galuega lelei, papatisoga, poo le fanau mai matua o lolotu, e le mafai ona avea ai le tagata, pe maua ai le malosi, e ola ai e tusa o le Upu a le Atua. Na o le fanau fou, ma fesui'a'iga mai totonu, e mafai ai ona ta'ua le tagata o se tasi o mulimuli ia Iesu Keriso. A lagona e se tasi lenei fanau fou, ona ia mauaina ai lea, pe ola ai, i talitonuga o ia faaali mai. A o talitonuga i ia aso, e le'i aofia ai nei a'oa'oga.

O Lana Faaaliga Lonalua: O le Pule Moni

O lana faaaliga lona lua e tau tonu lava lea i le fanau fou. Sa fenumia'i lava le mafaufau o Fosi e uiga i le "pule". O fea e sau ai, o ai na te maua, ma o ai o ia tausia? A o faitau e ia le Tusi Paia, ae ua fesoasoani ane le Agaga Paia e faamalalamalaina, ma ua mautinoa e Fosi, o se a'oa'oga i iunivesite o Oxford poo Cambridge - poo se isi foi iunivesite - e *faaaauu itulau e sosoo ai*

O le Mafuaaga o le Pese:
Standing On The Promises

mai le itulau muamua

O tatou uma lava e iai taimi i o tatou olaga e tula'i mai ai se faafitauli poo se mafatiaga e foliga mai ua matua tele atu i lo le mea e tatou te mafaia ona tau'ave, ona tatou fefefe ai lea ma faavaivai. Peitai o le Atua e tele lava ina ia faia mea faapea - o puapuaga ma mafatiaga - e tosina atu ai o tatou loto ina ia tatou faalagolago atoatoa atu ia te ia ma ana folafolaga.

Ua faasino mai e a'oa'o o le Tusi Paia e faapea, o le upu "fear not" - 'aaua tou te matata'u' - e faa-365 ona maua i le Tusi Paia. O lona uiga e tofu lava le aso o le tausaga

ma se folafolaga (promise). O le faalagolago i folafolaga pa'ia ona pau lea o se fofo mo o tatou popolega poo mea tatou te fefefe ai i lo tatou olaga faale-tagata. E oo lava i matua e tele ina fai ni a latou folafolaga ia latou fanau i se faamoemoega lelei, ae mulimuli ane ua le mafai ona latou faataunuuna. E matua ese mai ai lava lea i folafolaga a le Atua! O folafolaga a le Atua e "ioe ma amene". Ona pau lea o le mea moni e mafai ona tatou tutu ai.

O le tusitala ma le fatupese o Russell Kelso Carter, o se tagata e uiga ese lona talenia. I taimi eseese

i le 79 tausaga o lona soifuaga, o ia o se tagata taalo lelei, o se faifeau Metotisi galue malosi, o se fai lafu mamoe, o le porofesa i se iunivesite, o se tagata foi na ia tusia ni tusi se tele, ma i tausaga mulimuli o lona soifua, o ia o se foma'i i Baltimore. E le gata i le pese lenei na ia tusia, "Standing On The Promises", ae na ia tusia foi nisi viiga ma fati o pese, ma ia fesoasoani foi i le tuuafaatasia o le tusi pese: *Hymns for the Christian Life* i le tausaga e 1891. O fua aliali o le soifuaga o Russell Kelso Carter, o loo faaali mai ai mea moni e uiga i lenei pese - e na o le tatou piimau lava i folafolaga a le Atua e mafai ai ona tatou ola ma le faamoemoe mo le viiga o le Atua.

silasila i le pese i le itulau e 9

(George Fox: 1624-1691)

O SIAOSI FOSI

O LE NA IA FAASA'OLOTO LE AGAGA

le lava lea e avea ai se tagata ma faifeau, e pei ona talitonu iai ia aso. Ina ua tuu faatasi e Fosi ana faaaliga ia e lua, ona ia iloa ai lea afai e le maua e le faifeau le fanau fou, e le o ia o se faifeau moni. E le maua foi i lou a'oga i se kolisi. E pei lava foi o lou auai i se Ekalesia o le a le fai lea ma mea e avea ai oe o se Kerisiano moni. O le Kerisiano moni, o ia lea ua fanaufouina mai totonu, ma ia lagona le fesoasoani a le Agaga Paia, ma finafinai e saili i le Afioga a le Atua mo lona faapaiaina ma faatonuga. E lagona lava e le faifeau moni lona valaauina i lona loto, ma e fesoasoani le Atua ia te ia e mafai ai ona ia faatino ona tiute. E le faalagolago o ia i lona a'oa'oina, poo lona poto e faapea o mea ia e sili ona taua mo lona valaauina.

E talitonu Fosi e leai se tagata e

na te faatagaina se faauuga; na o le galuega lava a le Atua i lona alofa tunoa e mafai ona vavaeeseina ai lea tagata. E oo mai i nei aso, o faifeau a Quakers (The Society of Friends - O le Sosaiete a Uo), latou te faaali mai a latou pepa ua "faamauina ai" i latou e le lotu; ae le faauuina i latou pe fai ni o latou laisene. E talitonu i latou, na o le Atua lava na te faauuina; a o tagata e "faamaumuina".

O ia faaaliga a Fosi o se mau fou. Ua suia ai faiga ma talitonuga a le Ekalesia o loo iai. E oo mai i lea taimi ua avea lava le pulelaa e taofiofi ai le pule, ma avatu ai i le faifeau se lagona o ia e sili i lo isi tagata uma. Na oo ina maua e Fosi isi mea moni sa natia pe na faapi'opi'oina i le tu'inanau ma le mana'ona'o i le pule, peitai, i lenei taimi, o mea taua e lua - o le fanaufouina ma le valaauina moni

e le Atua - o le a avea ma ute o lana misiona.

Na faaali loa e le Agaga Paia ia mea moni e lua, ona amata loa lea ona faasaga atu Fosi e faataunu, ma ia folafola o le a ia alagaina mai tumutumu o fale. Ona liliu atu loa lea ua faafesaga'i ma ona matua ma ona aiga, ma ia faitauina fuaiupu mai le Tusi Paia, ma ia tuua'ia lo latou faifeau Perepereane e leai ni ona faailoga e tatau ai ona ia maua le tofi.

Na faate'ia lava matua o Fosi i uiga ua faaaliga e le la tama. Na maasiasi i la'ua i ana faaaliga ua fai, ma taumafai e faafilemu o ia ma fai foi ni a la faamatalaga e tau puipui ai o ia mai tagata, ma lo la faamoemoe o le a liliu ese mai ai i ona talitonuga. Ae leai. E le'i fo'i ai lava Fosi mai ia faaaliga ua ia faia, atoa ma mea moni ua ia susu'ea. O faaaliga ia mai le Atua na avea ma mea e matua sauaina ai o ia, ma faafalepuipuina ai ma sauaina ai i tausaga sa iai i le falepuipui.

mai le tusi: God's Generals
tusia e Roberts Liardon
faamatalaina e
Afemata Apelu Aiavao

o le Pese:
Standing On The Promises

mai le itulau e 8

Standing on the promises of Christ my King, thru eternal ages let His praises ring; glory in the highest I will shout and sing, standing on the promises of God.

Standing on the promises that cannot fail, when the howling storms of doubt and fear assail, by the living word of God I shall prevail, standing on the promises of God

Standing on the promises of Christ the Lord, bound to Him eternally by love's strong cord, overcoming daily with the Spirit's sword, standing on the promises of God.

Standing on the promises I now can see perfect, present cleansing in the blood for me; standing in the liberty where Christ makes free, standing on the promises of God.

Standing on the promises I cannot fall, list'ning ev'ry moment to the Spirit's call, resting in my Savior as my all in all, standing on the promises of God.

Chorus: Standing, standing, standing on the promises of God my Savior; standing, standing, I'm standing on the promises of God.

Pepa Mafutaga a Tina mo le Fono Tele 2016

Ia mua pea ia mea i Matautu Sa, ma ia tumau pea ia te ia le viiga e faavavau.

Ae ou te mua'i faatulou ma faafeiloa'i atu i le mamalu o le Fono Tele a le Ekalesia i lenei tausaga. Tulou. Tulouna lava.

Faafetai foi i le Mafutaga mamalu a tina mo le tofiaina o lo'u nei tagata faatauvaa, ma o se avanoa foi e le 'au maua. Ou te faamalulu atu foi pe afai o le a le tau sa outou silasila i se taumafaiga a le auauna vaivai.

Ae ua faavae se lagona i le tulaga ua oo nei iai le tatou lalolagi, i le faatauaina, ma le le faatauaina foi o tina. E ui foi o se mea na amata mai lava i le amataga o le faatuatuga faa-Kerisiano, ae faanoanoa ona o loo faaauau pea i aso nei, ma foliga mai ai, ua feteena'i le Tusi Paia, ma o tatou tulaga faaleaganuu, o tu foi ma aga faa-Kerisiano. Ua ou fia faatepa tasi ai lenei mamalu, i nisi o tina iloga o le lalolagi, ma a latou foi galuega o le faatuatua.

1. **Mother Theresa:** "O lo'u taofi, ma lo'u foi

naunauta'iga, ia olaola i le lalolagi le faatuatuga ia Keriso. Ia uluola ma lausiusi. (Observer 3 Fepuari 2016).

2. **Chancellor of the Republic of Germany:**

"Ia le manatu le lalolagi o le faatupu faalavelave, o se auala lelei mo le faaolaolaina o se faatuatuga faale-lotu. E sese!" (Time Magazine June 2016).

3. **Helen Clark:** (former NZ Prime Minister) "Obviously I'm a woman, but I never sought election of being a woman. I've always sought election, and I've sought election many times in my life, as the best person for the job." (Observer 6 April 2016).

4. **Naomi Fiamē Mataafa:** (Sui Palemia). "Our mandated responsibility and top priority would be management of land and other natural resources so that these could be sustainable for Samoa's future generations." (Newsline 1 April 2016).

5. **Toaipuapuaga Opapo:**

"O ai foi lo'u nei tagata, ua e manatu mai ai Iesu? E le o a'u foi o se faifeau, poo se failotu, poo se perofeta?"

"It happened and I believe", said Opapo, the father of the stigmata girl (Observer Aso Tofi 31 Mati 2016).

6. **Maria le Makatala:** Luka 1:38 - "Faauta o a'u nei o le auauna a le Atua, ia faia ia te a'u e tusa ma lau fetalaiaga."

I le mataupu foi o le "Stigma: (poo se faaali faapitoa iai e le Alii ona manu'a i luga o le satauro) e pei ona talia foi e le lotu talu mai Aokuso 1224 i le motu tuufua o Tuscan, Italy (Newsline Editorial by MP Sioa 1 April 2016) - o loo ta'ua ai Francis of Accissi o le ulua'i Stigmata. E ui lava o ia o se alii, ae ua faamauina, pe tusa ma le 80% o Stigmastics o tina.

Ua ou fia saunia ai sina pepa puupuu, ua faaigoaina 'O le Tala Lelei mo tina (The Gospel for Women), e fa'a'auto i le Luka 13:24: "Ierusalem, Ierusalem e, po ua faafia ona ou mana'o e faapotopoto i la'u fanau e pei o le moa ona ofaofata'i o lana toloa'i i lalo o ona apaau, ae le mafafai outou."

faaauau itulau e 11

A Page for Youth

ITULAU MO TUPULAGA TALAVOU

O le Alofa e le Faatua'oa

Mareko 15:24: *“Ua latou faasatauroina o ia, ona latou tufatufa lea i ona 'ofu, mafai ai le vili, e iloa ai le mea a le tagata.”*

Mai ia tausaga e fia afe ua mavae, e toatele tagata na latou faafitia Keriso. Na fulitua mai ia te ia, faalata ia, ma fai mai e leai so latou taimi mo ia.

Ae ui lava i lea, a oo i taimi latou te moomia ai se fesoasoani, poo se mea latou te

mana'omia, ona latou valaau lea ia te ia, ma talosagaina lona auai mai. Aemaise lava i nei vai tausaga o le tamao'aiga, ma le televavave o femalagaa'iga, lea e toetoe lava ina a leai ai se taimi mo le Alo o le Atua, ona o lo latou pisi, ae a tupu mai loa se mafatiaga, ona faato'a manatua loa lea o le Alii.

O le mea aupito ofoofogia e uiga i le faatuatua faa-Kerisiano, tusa lava pe faapefea ni ou uiga ia Keriso, e alofa lava

o ia ia te oe. E mafai ona e le amana'ia o ia, ma e tetee ia te ia, e te faalata foi ia te ia, ae a e valaau ia te ia i le taimi o lou puapuaga, e matua faapulupuluina atoa oe e lona alofa le faatua'oa, ma tali mai i ou mana'oga.

O le faasatauroina o Keriso na aliali mai ai o le alofa o Keriso e leai ni ona tua'oi. O le alofa e moni ma mama e leai se mea na te mafai ona taofiofia. Pe te lelei, pe o le a lava lou ituaiga tagata, pe ua tatau foi lea alofa mo oe pe leai, o le alofa lava lea ua finagalo le Atua e avatu mo oe. O le alofa e leai ni ona tuaoi. Mafaufau ane iai.

Na manu'a mo a'u!

mai le itulau muamua

O le Perenise o Windsor, lea na avea mulimuli ane ma Perenise o Ueese, na fai sa na asiasiga i se falema'i i Lonetona o loo ta'o'oto ai nisi o fitafita e aupito sili ona leaga o latou manu'anu'aga i le Taua Tele Lonalua a le Lalolagi. Na faafeiloa'i atu e le faauluuluga o le falema'i le alii perenise, ma faasilasila le perenise i fitafita manunu'a o ta'o'oto i o latou moega.

Na fesili le alii perenise, “Na ou faalogo e faapea o loo iinei nisi o fitafita aupito sili ona leaga o latou manu'anu'aga? E to'a fia?” Ina ua faaali atu e le foma'i pule e to'a 36, ona fai atu lea o le perenise, “Ou te fia feiloa'i ia i latou uma.” Na asiasia e le perenise fitafita uma ma ia iloa ai le leaga tele o manu'a o fitafita, peitai o loo lelei ona tausaga ma togafitia e le aufaigaluega a le falema'i. Sa faalototele atu o ia i fitafita, ma

fesilisili atu iai e uiga i o latou aiga, o latou ta'ito'alua ma fanau.

Na liliu ane le perenise i le foma'i pule ma fesili, “Na e fai mai e to'a 36 fitafita manunu'a leaga. Na ou faitauina e na o le 30. O fea o iai le isi to'a ono?”

“Lau Afioga i le Perenise, o isi e matua leaga lava o latou manu'aga. Na matou manatu ai e le taumate e te le fia silasila iai.”

“Lau Susuga i le alii foma'i, ou te fia vaai ia i latou uma. Fitafita uma o ta'o'oto manunu'a iinei, tusa pe o le a le leaga o o latou manu'a!” Ona tatala mai ai lea e le pule le faitoto'a i le potu o iai le to'a ono lea, o ta'o'oto mai ua leai ni o latou vae, poo lima, ua tauaso isi, o fusifusi atoa tino o isi, o tau faaola mai isi. O loo oioi tetele mai foi isi i le tigaina. Na matamata ma le alofa le perenise i fitafita ma tau faaloto tele atu iai. Ma toe fesili, “Na o le to'a 35 lea ua ta asiasia. O fea le fitafita e atoa iai

le to'a 36? Ou te fia vaai iai.”

Na ta'ita'i atu le perenise e le foma'i pule i le potu faapitoa mo le fitafita lea aupito sili ona leaga ona manu'a - ua tauaso, ua leiloa ni ona foliga ona ua masaesae uma pa'u o le ulu. Leai ni vae ma ni lima. O le tino talavou malosia, ua malepelepe i manu'a!

Na tu le perenise i tafatafa o le moega o le fitafita, mo ni nai sekone, ona punou ifo lea i lalo, ua sogi atu i le muaulu o le fitafita. A o tafe ifo ona loimata i ona alafau, na fai atu o ia i le foma'i pule, “Foma'i, o le fitafita lea, na manu'anu'a mo a'u! Na manu'anu'a mo a'u!”

MOTTO OF THE CHURCH

A Church should want people - not just to add one more to the roll, but in order to do something for each. The motto of the Church should be that of the Church's Master - **“Service!”**

Unhappily, the image of the Church many have is that of an institution which is always wanting something from people, rather than of one passionately anxious to give something to the people.

Why is that?

by William Barchlay

Pepa Mafutaga a Tina mo le Fono Tele 2016

mai le itulau e 9

Ua foliga tutusa nei mataupu e lua, o le Luka 13 & 15, ona o loo la taumafai e faamatala le Atua i se gagana faa-tina. E ui foi e tele a'oa'oga a le Alii e faamatala ai le Atua (o le Tama e alofa, e onosa'i, e finagalo foi ia faamuamua i loto o lana fanau lona Malo) ae ua aliali manino i ana aoaoga lona faaaogaina o ia lava uiga faale-Atua, e faamatalaina ai lona alofa i tina ma le lalolagi uma.

I le talitonuga foi fa'a-Katoliko, toe toe lava o latou faatulagaina tutusa lelei Maria ma le Alii Faaola - i lona tulaga o le taupou o le Aiga o Tavita, o lana to foi e mai le Agaga Paia. Peitai ua manino i le tala a le Tusi Paia, le lava ma totoo o faamaoniga o le alofa faa-tina o le Atua, e pei ona faaalii manino i le galuega faaola a Keriso i le lalolagi.

i) O le Atua e alofa ofaofata'i: Luka 13:34 “Ierusalem e, Ierusalem e, o le fasiotia perofeta, ma fetogi i maa e na auina atu ia te oe, po ua faafia ona ou mana'o e faapotopoto ia te oe....”

Na ia silafia foi le le tulaga lelei o lona nuu ma ona tagata i Ierusalem, na mafua ai sona naunauta'iga ina ia oo lava i ona tagata, e ui na vaoia o ia e lona lava nuu. Ua ia silafia foi o le a faata'ape'apeina i latou e le malosi o pule'aga a malo i ia ona po. Na ia valo'iaina foi le faatafunaina o le malumalu, ma o le a le toe iai foi se nuu o Iuta. O le ala lea o ana upu faa-tina alofa moni “Ierusalena,.....Ierusalem e,.....”

ii) O le Atua e alofa saili, ma faaola mai: (Luka 15:8-10) “.....Afa i le iloa ia te ia le tasi

tupe, e le tutu 'ea se moli ma tafitafi le fale, ma matua saili iai se'ia maua? Ou te fai atu ia te outou, ua faapea le olioli i luma o agelu a le Atua, ona o le tagata agasala e toatasi ua salamo.”

O loo talanoa nei faataoto e tolu: o le fafine ma le tupe na leiloa, o le mamoe na se, ma le atalii faamaumau mea, i le alofa saili faa-tina moni o le Atua. Ua na o se vaega foi o ana tupe lea ua leiloa a o lona naunauta'iga, ia toe maua mai, o le faaaliga manino lea o le pele ia te ia o le tupe. E mafai foi ona faatusa le tupe i le fanau a le Atua i le lalolagi o loo silasila mai pea iai o ia mai luga, ne'i leiloa atu i le ti'apolo. Faapei ona le faamalieina o ia i ana tupe o totoo, e faapena foi lona finagalo ina ia atoa pea lana fanau i lalo o lana silafaga pa'ia. Ia le mou atu foi lana fanau i le malaia, e aunoa ma lana silafaga mamana.

iii) E taua tele tina i le Atua:

E le taumateina le tele o se malamalamaga ua iai le lalolagi o aso nei i le mataupu o le alofa faa-tina o le Atua. Peitai i le uluai Ekalesia, o le tatalo lava a se vasega o tama: “Ia viia oe le Atua, ona ua e le faia a'u nei e pei o se tagata o nuu ese, ua e le faia foi a'u o le tina, poo se pologa”. - E iai foi i latou (Manicheans) e le talitonu i le iai o fafine i le lotu. Peitai na suia uma e Iesu ia aoaoga sese.

iv) O se meaalofo faapitoa mo tina le ola a'oa'oina: Luka 10:38-42). “Le Alii e, e te le manatu mai ea ina ua tuu mai e lo'u uso ia te au e sauni toatasi? A ua tali atu le Alii, “Mareta e, ua e popole, ma ua pupu lou loto i mea e tele, a o le

mea lava e tasi e ao ina ia maua; ua filifilia foi e Maria lea mea lelei, e le aveeseina ia te ia.”

O loo manino i upu nei a Luka, le tulaga auauna o tina, e le gata i le aiga a o le a'oa'atu foi i le lotu. E oo mai i le aso, masalo poo le 80% o faia'oga Aso Sa o le EFKS, o tina ma tamaitai. O le agaga naunauta'i foi ina ia a'oa'oina lelei o ia i Afioga a le Atua, o le faailoga lea o se tagata aloa'ia ma faaaloologia i ia ona po. E toatele foi tina auai i vasega faale-Tusi Paia a le Alii. O Maria foi, ua le ta'ua o se tina e a'oa'oina faapitoa mo le tausiga o se fanau. O ia o le Tina Paia, o lona a'oa'oina foi e le Alii, e patino mo ia lava, ae le mo nisi. O lona mafaufau magafagafa lelei foi, na a'oa'oina ai o ia i se tulaga e gatasitasi lelei ai lona olaga ma le finagalo o lona Matai. E tulaga ese ai lava la Maria ia mai le vasega uma.

v) E agasala foi tina: (Luka 7:36-50). “....Faauta foi o le fafine o le 'a'ai, o ia o le fafine agasala, ua iloa e ia ua taoto o ia e taumafa.....Ona aumai ai lea e ia o le fagu alapasa ua tumu i le suauu manogi....”. Ua faliu atu o ia ma fetalai atu ia Simona, “.....ua e iloa le fafine nei? Na ou ulu mai i lou fale, e te le'i aumai ni vai mo o'u vae, a o ia nei ua faasisina ifo e ia o loimata i o'u vae, ma soloi ai i lona lauulu.”

O loo manino i nei fuaiupu, le taliaina lelei e le Alii o le mea na faia e le tina mo ia - o le u'uina lea o ia i le u'u nato tautele, ma lona lauulu e solo ai ona 'a'ao. E ui o se aga e le taliaina e le lotu Iutaia, ae ua faaalii manino ai lona le faailogaina o ni tagata. E oo foi i agasala aupito mataga, na te matua faamagaloina (f.47). “O lea foi ou te fai atu ai ia te oe, ua faamagaloina ana agasala e tele, aua ua alofa tele mai o ia, a o le ua faamagaloina iai o se mea itiiti, ua itiiti foi lona alofa.”

faaauau itulau e 13

Salamo 145:14-21

O le vaega lenei o le Salamo 145, o loo tautala mai e uiga i le tausiga a le Atua i e o loo mafatia ma maua i ni puapuaga o le olaga, o loo fautua mai foi mo tagata o le Atua, o e faatuatua i le Atua, ina ia vivii atu i lo latou Atua.

E faigofie lava ia i tatou ona tatou vivii atu i le Alii pe afai e faataunuaina ma le manuia o tatou mana'oga. Peitai, tatou te vivii atu i le Atua pe a tatou vaai atu e le o tali mai ia tatou olega ia te ia i mea tatou te manana'o ai?

Se'i o tatou mafaufau ane lava ia Matini Rinikati i Elenepeka i Siamani. Na taunuu atu o ia i Siamani i le taimi tonu o le amataga o le Taua e Tolusefulu

Tausaga (Thirty Years' War) i le tausaga e 1618. E le taumate o le taua lea na matua malepelepe ai atunuu o le lalolagi na aafia ai. O le faitau aofa'i o tagata o Siamani na iai i le amataga o le taua e 16 miliona, ae uma ane le taua ua na o le 6 miliona o totoe.

Ona o Elenepeka e aupa atoa, o lea na mafua ai ona sulufa'i iai le toatele o tagata mai itu eseese o le atunuu. O le toatele o ia tagata na latou o mai ma ni ma'i leaga i le mea o lea ua tumutumu iai le atunuu, o Elenepeka. Ina ua pepesi le faama'i tele i le tausaga e 1637 i le aai o Elenepeka, na o Matini Rinikati le faifeau o totoe i le aai atoa. I le tausaga lava lea e 1637,

na ia faia ai toe sauniga lotu o tagata maliliu e to'a lima afe, e aofia ai ma lona to'alua.

A o le vai taimi lea o le faama'i pipisi e tolu sefulu tausaga, na tusia ai e Rinikati le pese faafetai i le Atua: "Now Thank We All Our God." I lea viiga na ia viia ai le Atua mo mea uiga ese ma le matagofie na ia faia, ma ia ta'ua loto ua tumu i le fiafia ma le filemu.

O le toatele o tatou, e faigata lava ona tatou vivii ma faafetai i taimi o faanoanoaga ma puapuaga, a o Matini Rinikati, na ia vivii i le Atua i le taimi atoa lea o le Taua e 30 Tausaga.

Le au faitau e, tatou faaa'oa'o ia Matini Rinikati, ma ona lagona na ala ai ona ia tusia le viiga o ta'ua nei i le tatou tala.

Salamo 145:14-21

E taofia i luga e le Alii atoa uma e pa'u'u;
o ia fo'i le faatusa'oina o e ua faano'uno'u uma lava.

E faasaga atu ia te oe mata o mea uma lava;
e te avatua foi a latou mea e 'ai i ona aso e tatau ai.

O loo e faamafola lou aao,
ma fa'ama'o'ona le mana'o o mea ola uma lava.

E amiotonu le Alii i ona ala uma;
o loo alofa ia i ana mea uma lava na faia.

E latalata mai le Alii ia i latou uma o e valaau ia te ia,
o i latou uma o e valaau ia te ia ma le faamaoni.

E faia e ia le mea e mananao iai o e matatau ia te ia;
e faafofoga foi o ia i la latou alaga atu, ma na faaolaina i latou.

E tausii le Alii i e alolofa atu ia te ia uma lava;
ae fano ia te ia o e amio leaga atoa uma.

O vii o le Alii e ta'u atu e lo'u gutu;
e faafetaia e tagata uma o lona suafa paia, e faavavau faavavau lava.

Ta'u ia Keriso mea o e Mafatia ai

Na fesiligia se tagata fai pisinisi o loo mafatia i le tele o faafitauli tau i lana pisinisi, pe faapefea ona maua sa na moe i le po i le tele o mea o mamafa ai lona mafaufau tau i lana pisinisi, ae tali ane. E lafoa'i uma lava o'u faafitauli i le Atua, aua fai mai le Salamo e 121:4: "Faauta, o le leoleo ia Isaraelu, e le tulemoe ia, e le moe

lava." O le mea lea, a uma ona ta'u ona faafitauli i le Atua, ona moe loa lea filemu e le toe popole i se mea.

Ua uma ona folafola mai e Iesu e na te le tuulafoa'i pe faagaloina tatou. Pei ona fai mai le Eperu 13:5: ".....aua ua fetalai mai o ia, Ou te le tuua lava oe, ou te le tuulafoa'iina lava ia te oe." Ua ia

valaau mai ia i tatou ua mafatia ma tigaina i avega mamafa o faafitauli o le olaga, ina ia o atu ia te ia mo se malologa.

Ae le faapea la o o tatou faafitauli uma lava o le a mou atu ona ua tatou tatalo i le Alii. Ae o lona uiga, afai e te tuu lou faatuatua ma lou talitonu i le Atua, ma e faalagolago ia te ia i le tatalo, o le a e maua se lagona o le filemu o lou mafaufau lea o le a na faasino oe i le ta'ita'iga a le Agaga Pa'ia.

O lona lava malosii, o le a mafai ai ona e fo'ia ou faafitauli e tusa ai ma le finagalo o le Atua.

Fai mai le 1 Peteru 5:7: "Ia tuuina atu ia te ia mea uma tou te popole ai, aua o loo manatu mai o ia ia te outou."

O le Fetu Taimane

O le tausaga e 2011 na maua ai e saienitisi su'esu'e o le vateatea se fetu fai mai i latou, o lona tino atoa, na o le taimane lava. O lea fetu e tusa o le faalimaina lea o le lapo'a o le lalolagi o tatou nonofo ai.

Pepa Mafutaga a Tina mo le Fono Tele 2016

mai le itulau e 11

vi) E ola faitaulaga foi tina: (Luka 21:1-4) “.....aua o i latou uma ua lafo atu i taulaga nisi mea mai a latou mea ua tele, a o ia ua mativa, ua lafo e ia ana mea uma e ola ai sa ia te ia.....”. O nai ana tupe iti lava e lua, ua lava lea ma totoe mo le Alii. O lona lea manatu. Ua sili foi lea, i tupe uma a e maumea na o ane e ofo atu taulaga.

vii) O tiga faa-tina, e ogaoga ia pei o puapuaga o le Alii. (Luka 21:20-24). “.....A iloa e outou a siosiomia Ierusalemia i ‘au o le taua, ia outou iloa i lea aso ua latalata lona faatafunaina....”

O tina ma fanau, o isi ia vaega o tagata sa sili ona ogaoga lo latou sauaina i le taimi o sauaga o le lotu.

Ua faapea ai foi ona tuga ana saunoaga e uiga i le ola agasala o le lalolagi ua oo mai lava i le aso. f23-24: “Oi talofa i fafine ua toto, atoa foi ma e failele i ia lava aso, aua e oo le puapuaga tele i le nuu, ma le to’asa i le nuu nei. E oti i latou i le mata o le pelu.....” Pe le o le mafuaaga lea o le faaali faapito e le Alii, i tina, o ona faalavalava i luga o le satauro? E ui lava i lea, e iai le talitonuga e toatele i latou, e aofia ai ma nisi o le aufaigaluega, e le taliaina le faaaliga na faaali mai i le afafine o le faifeau EFKS. O le loloto lena o le Mataupu Silisili o lona maliu ma lona toetu manumalo mai i le tuugamau.

Upu Faaiu:

Le paia e o le Ekalesia, ua faaali mai

e le Tusi Paia mo i tatou i lenei taeao, o le Tala Lelei mo tina, o le tala e tasi ai uma tagata i le Alii. Kalatia 3:28. “E le o iai se Iutaia poo se Eleni, e le o iai se pologa poo se sa’oloto, e le o iai se tane poo se fafine, aua ua tasi lava outou uma ia Keriso Iesu?” O a foi ni suiga o loo tatou fuafuaina mo le manuia auiluma o lana Ekalesia, e talitonu le taofi e mafaia ia mea ina ua tasi tatou uma ia Keriso. Ma ua ou fia faaiu ai i upu o le tatalo (Prayer of Serenity) a se tasi o tama Kerisiano iloga o le Tusi Paia o Reinhold Niebuhr (1892-1971): “God grand me the serenity to accept the things I can’t change; courage to change the things I can, and the wisdom to know the difference.” (Observer 18 April 2016). “Foa’i mai le ola faapaiaina, ou te talia ai mea ou te le mafaia ona suia; le malosi e suia ai mea ou te mafaia, ma le atamai ou te iloa ai le eeseega.”

Ia manuia le usua o lana Fono Tele 2016.

To’atolu Ieremia
EFKS Fagalii,
Pulega Vaimauga Sisifo,
Matagaluega Apia i Sasa’e.

O ‘Au mo Suo Galue

O Apolo Kivepuleia (Apolo Kivebulaya) o se tasi o tagata pa’ia iloga o le Ekalesia Kerisiano i le Konetineta o Aferika. O se isi lenei o tala mai lana galuega faamisionare i le Konetineta o Aferika.

O se tasi o tala na faamatala maninoia ai uiga o Apolo, o le tala i lona taunuu atu i le nuu o Mboga i le atunuu o Congo. E le o ia se ulua’i misionare Kerisiano na taunuu i lea nuu. E toalua isi misionare na muamua atu ia ia, ae na la toe tuua le nuu, ona la te le’i maua mai ni meaai mo la’ua mai tagata o le nuu, ma matelaina ai i le fia ‘a’ai. O misionare ia e toalua, o ni tagata mai le ituaiga o Baganda i lea lava atunuu, o tagata e talitonu o galuega e pei o faatoaga, o se galuega e faia e fafine ma tagata pologa, ae le o ni

galuega mo tamaloloa. Ina ua le fafagaina la misionare nei e tagata o le nuu o Baganda, na toe fo’i ai loa lea o i la’ua i lo la nuu. E le’i manana’o e faamatagaina i la’ua i lo la galulue lea e toto ni meaai mo la’ua la te ola ai.

Na iloa lelei e Apolo le tulaga lea, ma le talitonuga o ia tagata, o le mea lea na taunuu sauniuni ai lava o ia mo lana galuega faamisionare. A o sopo atu la Apolo i le vao e aga’i i Mbonga, na ia taina ai ni ‘au mo ni ana suo e na te faaaogaina mo sa na faato’aga e fai e tua iai, pe a taunuu i le nuu o le a galue ai. Ina ua vaai atu Taparo (Tabaro) le alii taua o le nuu o alu atu Apolo ma amoamo atu ana ‘au suo, na ia faapea ifo ai i lona mafaufau, “A! o le sa’o la lea. O le ituaiga tagata lea e na te mafaia ona fai o le galuega.”

O ‘au suo o ni mea e foliga faatauvaa mai, peitai i le vaai a le pule o le nuu, o le faailoga lea o se tagata ua sauniuni e faia soo se mea e lagolagoina ai lana galuega. O le faailoga o le tagata ua sauniuni e galue ma le faamaoni, to’aga, mataala, e le paie, e sogasoga ae le nofonofa ma faatalitali se’i o atu tagata e avatu ni mea mo ia. O le ituaiga tagata lea e taliagofie e le lalolagi, o le tagata ua sauniuni e galue ma le faamaoni i soo se mea na te faia.

E mafai foi ona tatou faapea, o ‘au suo a Apolo, na talitonu ai tagata o lea nuu o Congo, e le na o le lauga ma fai o lotu le mea lea o le a fai e Apolo, ae o le a galue foi e fai le faato’aga e tua iai le galuega.

I lalo o tulafono a tagata Iutaia, o rabbis, o a’oa’o poo faia’oga o le tulafono, o tagata aupito popoto ia poo faia’oga iloga i ia ona po.

faaauau itulau e 15

O 'Au mo Suo Galue

mai le itulau e 13

E tulaga tutusa i latou ma porofesa i ona po nei. Peitai, o le talitonuga o tagata Iutaia, o porofesa uma o le tulafono, e tatau ona iai nisi a latou galuega e galulue ai. E le faatagaina se porofesa Iutaia ona ia talia ni tupe e totogi ai ia pe a lauga pe faiaoga. E tatau lava ona iai se isi ana galuega e tausi ai ia. Ma ua tatou faitau i nisi o "porofesa" Iutaia o tagata su'isu'i, kamuta, fai u'u manogi, 'otiulu ma sele'ava. A o faifeau tagata ia! O tusiupu o le tulafono! O porofesa! Ua tatou iloa foi le galuega a se tasi o a'oa'o iloga Iutaia, lea na avea ma Kerisiano iloga o le Tala Lelei, o Paulo. O le isi ana galuega o le su'i fale'ie, poo se tasi e galue i pa'u o manu. O le rabbi, rapi, poo le faia'oga, a'oa'o, porofesa Iutaia, e le gata ina faaaogaina o lona mafaufau ma upu i ana lauga, ae sa mana'omia foi lona faaaogaina o ona lima e fai ai se isi galuega.

E iai se tala na tusia e se tasi o tusitala, writers, ta'uta'ua o Rusia, o Tolstoy, e uiga i se tamalii Rusia e tatala lava lona fale mo soo se tasi e afe atu iai. Sa talia e lenei tamalii soo se tasi e afe atu i lona fale i le taimi o 'aiga afiafi, na te taliaina. Na te le esiesiina. Ae tasi lava le lave! E ulufale atu loa le tagata ona fesili atu lea iai le tamalii lenei: "Faaali mai ou lima!" Afai e faaali mai lima o le tagata e patupatu, mafiafia pa'u ona o le galue, ona faasino lea iai e le tamalii le nofoa i le ulu o le laulau e nofo ai. Ae a lamolemole lima e foliga mai e le'i faia ai lava ni galuega se tele ma le mamafa, ona faasino lea iai se nofoaga i le si'usi'u o le laulau. O le faailoga lea o le faatauaaina e le tamalii lenei o le tagata galue.

O le tagata tusitala (writer) o Dr Jacks, na ia faamatalaina le tala i se leipa e galue i le fauina o auala

o nofoaafi. O se tagata leipa e le amana'ia lava e le toatele o tagata. Na fesili se isi iai pe o le a sa na tali pe a oti, ae taofi mai ia i faitoto'a o le manuia ma fesiligia pe o le a se mea na te faailoa atu e tatau ai ona tatala mai faitotoa mo ia. Na nofonofu teisi le leipa lenei mo ni nai sekone, ona vaai ifo lea i lana suo, e fufulu ma faamama lelei mo ana galuega, ona tali atu lea, "E le taumate lava ou te faaali iai la'u suo lea."

Fai mai le tala a le tusitala lenei o Jack, o le tele o ana tusi na tusia, e ofuina ai lona peleue tuai ua manifinifi ma iai foi masae i le tulilima taumatau, ona o le faaaogaina soo, ma totoo ai lona tulilima i luga o lana laulau a o tusia ana tusi. Fai mai a ia, "Ia, atonu e tatalaina mai faitotoa o le manuia mo a'u pe a faaali atu iai lo'u peleue ua manifinifi le tulilima i le totoo i le laulau tusitusi."

O se tasi o mea ofoofogia e uiga i le galuega faafaifeau, ona o le toatele o tagata e talitonu e le tele ni galuega a le faifeau e fai, ma e

le taumate e moni foi latou pe a manatu atu i nisi o faifeau.

Peitai, e leai se mea i lenei lalolagi e sili atu ona faavaivai tagata i lo le mafaufau ma su'esu'e i se mataupu; e leai foi se mea e sili ona e mafatia ai i lo ou lagona pe a e asiasi atu i tagata mafatia ma e taumafai e fesoasoani atu ia i latou ma faamafanafana iai. I le itu la lea, e manatu ai, e leai se galuega e sili atu ona faigata i le lalolagi nei, i lo le galuega faafaifeau.

A o le faifeau e faafaigaluega e ia lava ia. E leai se isi na te vaaia pe o fai lelei lana galuega, fai ma le faamaoni. I le itu la lea, e ono faaososoina ai i le moe umi ae le vave ala e fai le galuega. Ma oo ina faifaia ai i le aso atoa ae le faia lelei le galuega.

E mana'omia le pulea lelei e oe ia oe lava, ma 'ou te manatu ai e leai se galuega e sili ona mana'omia ai o lou pulea lelei o lou ola, i lo le galuega faafaifeau.

tusia e William Barclay
i lana tusi:

"In the Hands of God"
faamatalaina e

Afemata T. Apelu Aiavao

Tatalo e Leai ni Upu

E matua pogisa lava ina ua ou ulu atu i totonu o le falesa. Ua ou le iloa pe aisea na ou ulufale ai i totonu o le malumalu. O le taimi lea o loo auai la'u fanau i faatasiga a 'autalavou e le mamao ma le falesa. Na ou ulufale i le malumalu se'i ou nofonofu ai a o o'u mafaufau i nisi o a'u uo i le matou aulotu. Na ou mafaufau i le isi o latou, o se alii o loo maua i le kanesa ma ua le mafai ona togafitia. Na ou nofo i le nofoa e masani ona nofo ai i taimi o lotu. Na ou taumafai e tatalo mo ia, ae ua ou le mafai ona tautala i ni upu. Ona ou nofonofu ai lava lea ma ou

faanoanoa mo ia ona o lona ma'i. Ua ou nofo e pei ona masani ona nofo le tamaloa i le nofoa lea - o o'u tulilima i luga o o'u tuli, a o o'u alofilima o fa'a'ofu'ofu ai o'u mata. Sa ou tatalo mo ia, ae leai ni upu.

Ua te'a sina taimi, ona ou faasolo atu lea i le isi nofoa e masani ona nofo ai se isi fo'i o a'u uo. O la'u uo tama'ita'i lea, e talitonu o ia na faalata o ia e se tasi o le aulotu, ae le'i mana'o e ta'u i se isi. Na ou nofo sa'o i le nofoa e masani ona nofo ai, e pei ona nofo sa'o le tama'ita'i lea i sauniga lotu. Ma ona foliga e peiseai e fai mai, "O le a ou taumafai e faamalosi ma aga'i i luma." Ona ou tatalo foi lea ma faaaoga le manatu lea, ae leai ni upu.

faaaauu itulau e 16

O E UA MALILIU

**Asomua
Manu'aito'alasi
Luatutu lese Pouafe
8 Oketopa 1957-19 Me 2016**

O le Susuga i le A'oa'o Fesoasoani, o ona matua o Reupena Tauaefa Pouafe o Salesatele o Falealili, ma Pua Logoasa o Salelologa. Na faaipoipo atu ia Filitafea Agnes Pouafe o Moataa i le aso 20 o Aokuso 1981. Na soifua mai o ia i Fasitootai a o galulue ai ona tuua i le galuega tausinu. E to'a ono le fanau, tasi le teine ae to'a lima tama. E to'a valu fanau a lana fanau, e to'a fa ona tuafafine o loo soifua le to'alua ae ua malii le to'atasi.

Sa ta'ita'i e le Toeaina ia Utufua Naseri le toe sauniga, tatalo Faatafa Nefu FS, Tusi Paia ma le lauga ia Talalelei Tuafafo FS ma faaopoopo iai le Taitaifono o le Au Toeaina, le Susuga i le Toeaina ia Anesone Tavita. O au na faia le molimau faaleagaga o le auauna.

Ou te le toe ta la i Utumaau pe toe fagota i le tai sua, sei tau saili ni manatu ma ni lagona aua se molimau i le uso a auauna, aua ua faapei ona tala mai le lagi le mamalu ma le silisiliese o le Atua ma faaalua i le vanimonimo galuega mamana a ona 'a'ao, ua faapea foi ona faaalua i le aso i lona toe sauniga ma lona sauniga faaleaiga ma le gasolo mai o paolo ma gafa sili'ilagi e ui e lei faasalalauina, ma ua fai lea ma molimau i le auauna lelei, ua tautala mai foi galuega e fai ma molimau ma ua leo tele nai lo sa'u upu ma se faamatalaga aua e le taitai ona lava ni a'u upu e faamatala ai le auaunaga a lona soifua faaleagaga. Ua silafia e nisi

o ana auaunaga i le Ekalesia e pei ona avea ma tiakono i le 29 tausaga o lona soifua i le 1986 ma avea ai ma failautusi teutupei i le 30 o ona tausaga ma tulai mai ai lava i le laulauafono a le aulotu seia valaau iai o lona Matai i le 58 tausaga o lona soifua a o fai ai o ia ma taitaifono o le aulotu nei, ma ua 29 tausaga o lana auaunaga i le Atua e ala i lenei aulotu.

O se auauna sa maopoopo ai le galuega talu ona ma taunuu mai i lana tofala'iga ma lana tofa mamao e pei ona molimau ai le tele o tagata, i lana faatolotolo ma si ana tuumumusu e pei o se tagata e le iloa tautala, a o se feau na aumai sa faamalieina ai le mafaufau. E le se tofa e seetia gofie i sou naunau atu ae manatunatu lelei faatoa aumai ai sona finagalo, i se

**Fugaipaono Pati
Lefue
10 Me 1945 - 18 Fepuari 2016**

O le tiakono, a o le A'oa'o Fesoasoani foi. Na soifua o ia i Si'upapa Saleapaga i le aso 10 Me 1945, ae malii i le aso 18 Fepuari 2016 i lona maota i Lotofaga lava. E to'aono le fanau, 4 teine ma tama e to'alua. E 16 e na tutupu mai ai. O lona tama o Lefue (Saleapaga), ma le tina ia Faamita Lotofaga).

Na faaipoipo ia Toe'e Molioo i le aso 29 Tesema 1973, Na faauu i le tofi tiakono ia Aperila 1992. O le Fono Tele 2002, na maua ai lona tusi faamaonia (A'oa'o Fesoasoani).

Ou te molimau atu, o se auauna e le tau faasinoa i ona tiute. E saunia i soo se mea. E loto maualo ma agamalu. E tausafia ma to'amalie. E faamaopoopo i soo

galuega ua fia faagasolo a o Asomua ua mafaufau ma le loloto, e tapenapena i mea uma, e pei foi ona sauni lelei o ana lauga. O Asomua sa ia faataoto se alafua o se lafoga ua faaigoaina o le loto malie e lafoina i Aso Sa uma, ua na o le pau lea o se alaga tupe sa fai ai o mea uma o le galuega na faaopoopo i le sene i Aso Sa uma. E leai se mea e gase o le galuega aua na ia mae'a lelei ona faataoto le alafua o mea uma, pe a tutupu mai ni pefea o le galuega - e pei o faalavelave tau i le Ekalesia, ni malii poo nisi lava mea e aafia ai le aulotu, ua mae'a ona ia tapena le faagasologa lelei o ia faamoemoe pe a oo ina tulai mai.

Ua faamae'a i lona oliolisaga tumau i lona maota i Moataa ma lago mau ai le auauna. "Le auauna lelei e ma le faamaoni, ulufale mai i le fiafia o lou Alii.

Efu Efu FS, EFKS Aai o Niue


se vaega o le galuega. O se mea fiafia i lenei auauna o le fai o le finagalo o le na valaauina o ia.

Na faataotolia i se gasegase faaumiumi ma le faigata. Sa saili i le falema'i ma taulasea Samoa, peita'i, ua uma le poto o le tagata, ona fo'i mai lea i lona aiga ma i'u ai lona soifua.

O lona toe sauniga sa faia i le aso 27 Fepuari 2016, i le maota tapua'i i Lotofaga. O a'u na ta'ita'i, molimau ma lauga, a o Faito'aga T. Tolua FS, o le Faatonu o A'oa'oga Kerisiano, na faaulufale le a'oa'o mo lona toe sauniga ma tatalo. Molimau: Toe M. Lefue, (faletua), Ene (atalii), Maseiga (uso o Toe mai Niu Sila). Na ou faaiuina le toe sauniga i lona 'oli'olisaga tumau, ma matou faamavae atu ia te ia i le Pese, "Talofa Uso e, Tofaina oe.....E ala oe, pe a mavae le po. Tofa! Tofa! Tofa!"

Iosefa Uilelea FT,
EFKS Lotofaga - Aleipata

O E UA MALILIU



Fuiavaiiili Fialelei Nuu

15 Iuni 1930 - 5 Aperila 2016

O le tiakono Lotofaga. O ona matua o Toilalo (tama) Taelefaga, ma le tina o Felaua'i o Lotofaga. Na soifua mai i le aso 15 Iuni 1930, a ua maliu i le aso 5 Aperila 2016. Na faaipoipo ia Lemau i le aso 30 Novema 1948. E sefulu le fanau. O e na tutupu mai ia te ia e 133.

O le faaiuga o le 1989 na malaga ai i Niu Sila e saili manuia, aemaise o fanau. Na galulue i le aulotu i East Tamaki ma le Susuga ia Peniamina Vai ma le faletua ia Rosa, faaauau i le Susuga ia Heperone Futi ma le faletua ia Mafa.

E le'i 'ela le silasila mamao a le tama mo le manuia o le aiga ma le fanau. E 20 tausaga oi Niu Sila. Ua mautu ma manuia fanau. Ua pale mai nisi ma avea o ana taulaga tagata mo le galuega a le Atua. Toe talii mai i Samoa i le 2009, ma matou toe galulue. Faaauau le auunaga i le tofi tiakono. E leai se mea e pa'u, aemaise le fai taulaga ma le tausiga o le faifeau. O se auunaga e loto i le galuega a le Atua.

O ona toe aso, na sii atu lona gasegase i le falemai o T.T.Meaole a o lumana'i le Aso Malii. Na asiasi iai, ma'eu vavega o le alofa o le Atua i

suiga lelei. Na te'a i tua i le Aso Sa Toetu, Aso Gafua 4/4//16, malaga siima'i ma le tina i Niu Sila. O le aso na sosoo ai na maliu ai, a o vagavagaia e le aiga ma le fanau o ia i le falemai i Middlemore i Aukilani. Taunuu mai i Samoa le tino maliu o le tiakono i le aso 10/4/2016, ona mapu atu lea i lona maota i Lotofaga, seia aulia le aso 15 Aperila, na faataunuu ai lona toe sauniga. Na malaga mai le toatele o aiga aemaise fanau mai

atunuu mamao, e auai ma molimau i toe sauniga o le tama.

O lona toe sauniga na faia lava i lona maota (Alasopo). O a'u na ta'ita'i, molimau ma lauga; Tusi Paia - Vaigafa Paleono F.F.A.; tatalo Kirisimasi (A.O.G.), molimau Lemau (faletua), Rev. Leaenalesolo Malu, Tavaiaiga Peni. Na faai'u lea i lona alalafaga mau, ma faatofa atu ai ia te ia i le pese a le Au Kerisiano: Talo Uso e, Tofaina Oe..." Amuia e ua oti, o e ua oti oi le Alii."

Iosefa A. Uillelea FT,
EFKS Lotofaga, Aleipata



Fugaipaono Pati Lefue

10 Me 1945 - 18 Fepuari 2016

Tatalo e Leai ni Upu

mai le itulau e 15

Na oo ina ou oo atu i le nofoa i le ogatotonu e masani lava ona nofo ai se tasi o a'u uo, ua tete'a ma lona to'alua. A nofo ai le uo lea, e tuu lava lona lima i luga o le faalagolago o le nofoa pei ona ia masani ai, ma fusi mai lona to'alua a o la nonofo e le'i tete'a. Ona ou alu atu foi lea ua ou nofo faapea. A o o'u mafaufau ma ou lagona ona tiga i le malepe o lona aiga, na ou manatu ai o i latou uma ia e le taumate lava na latou talitonu ua tuulafoa'iina i latou e le Atua. Ona te'i ai lava lea ua oso mai upu i lo'u mafaufau ma ou tautala: "Fesoasoani mai lau Afio ina ia latou iloa e te alofa ia i latou."

Na oso faafuase'i mai ia te a'u le lagona, e le saogalemu lo'u iai to'atasi i le falesa i lea taimi, ona o le pitonuu lea e tele ai kegi leaga. Ae na ala ona ou alu i le falesa pogisa, i le pitonuu e tele ai kegi leaga ma faatupu faalavelave, ona o le luluti o o'u lagona alofa i a'u uo uma ia ma lo latou fia maua o se fesoasoani i o latou mafatiaga. Latou te le iloa mai le mea ua ou faia, ae silafia e le Atua ma ia fesoasoani mai, e pei ona ou matauina i aso mulimuli ane.

tusia e Jan Johnson



Asomua Manu'aito'alasi Luatutu Iese Pouafe

8 Oketopa 1957-19 Me 2016

SUFFERING

Health is a good thing, but sickness is far better, if it leads us to God.

O le Soifua Maloloina o se mea lelei, ae sili ai le ma'i, pe afai e taitaiina ai tatou i le Atua.

by J.C.Ryle